

մի քանի վերստ տարածութիւն ունին եւ այսօր բնակչութիւնը մեծամեծ այգեստան-պարտէզներում բնակարաններ ունի ուր եւ ապրում է թէ՛ ամառը եւ թէ՛ ձմեռը: Բահլ առուակին միանում է Յատլիցքար առուակը, որ ոռոգում է համանուն գեղը:

Այս կործանուած ոստանի ամէն կողմը, ինչպէս Բահլի, նոյնպէս Հուզասիւեւի եւ Պալխարի, կան բազմաթիւ աւերակ բերդեր, ամրոցներ, դղեակներ, պալատներ, տաճարներ եւ վանքեր, որոնք 40 դարի անցեալ ունին եւ կերտուածքները խօսում են իրենց դարէ-դար կենցաղի արկածներն ու զարգացումը:

Պալխար վտակը Կորակ առուակն ընդունելուց յետոյ առաջ է գնում եւ բացի մանրմունր առուներից, ընդունում է Որթի-բաղ, Դեւթիսա, Սարգեօլ, Ծոխբար եւ արեւելեան Ութավի առուակները իր ձախ կողմից, որոնք ոռոգում են համանուն գեղերը եւ խառնում Պալխարին: Քիւֆիւրդ եւ Գուլի-խան լեռներից իջնում է Արջեւան առուակը, ձախից ընդունում է Սովիցկալ առուակը, որոնք ոռոգում են համանուն գեղերն, սրանց եայլաներն ու մացրաները, ախոռներն ու հանդերը. հիւսիսից-հարաւ իջնելով, ոռոգում են նոյնպէս Վակէ գեղն ու բերդը, Կոշմարիա, Արմաշէն, Օադէմ, Շադում, Խամրուտ, Միմատգեղ գեղերը, միանում են սրանց համանուն առ-ին, իջնում միանում